

O pese logo i tino

Lavea Tupuola Lemalu Malifa

**O LAU GAGANA, O LOU
FAASINOMAGA MAI LE
ATUA**

E iai le mau, “E leai se mea e
tasi na faia e le’i faia e le Atua.”

O le gagana Samoa, o le meaalofa mai le Atua mo tagata uma
o Samoa. Ua se faasolo manogi e toli ma susu’i mai le nanamu
fa’asau o ananafi, le asō, ma a taeao.

O le ‘oa o le Gagana Samoa e maniti ai tino. E maligi ai
loimata. E ea vanu ma solofa ai mauga. O le vaimalu i le loto
mafatia. O le matagivale fo’i na te feulaina le malamalama o
le mafaufau. O le ta e le agaia. Ma le pulufana e le alofia.



O le gagana fo'i o le ave avega mamafa. E molimau le tele o pese ma solo i le pologa o lo'o amo e le mafaufau. Pei a pesepese lava ona pei a lea o loo talatalanoa ma le pele. Ft Fia vaai atu e, ua e sau, faase'ese'e mai i Peau. Ou te faatali atu ou te faatali se'i e sau.

O loo molimau fo'i le solo a Afoafouvale i lona moomoo ma le misia o le olaga sa iai i Upolu o ia o le Aloalii. Sa tafilisaunoa i toga, tamaitai ma taumafa ae ina ua aunuuu mai le motu o Salaia nei ona saafiafi lea i le olaga sa iai. Ua fai nei ma solo sulatoga.

“Moemoe o'u te'i a'e
Sa ta miti ea pe ua ta ala valevale
Pisa teine ae va tama se taliga toga ea pe ni faiga taumafa
Po ua toai se i'asa i le meaga
Pe ua ta 'u'u pe ua ta pani, ua ta moe i le va o tama'ita'i”

Ua sau i Tutuila o se pagota. Ua le toe pania lona ao e tama'ita'i, ua le toe moe i le va o teine, leai ni i'a sa ma ni toga.

Ua na ona maniti o tino, maligi loimata, ona tautala lea i se gagana se'i vaimalu ai le loto ua mafatia.

O le gagana o le pulufana e le alofia. Na pau lea o le auupega malosi sa ia Namulauulu Lauaki na lalase ai le loto ti'a'a o le pulega a Niu Sila ae na faasaga fo'i e faaaoga le gagana e faalototele ai le au faalotolotolua o ai na fefe, na loto tele.

Le tioa fai mai le Kovana Siamani o Siaosi Sulusi, ”afai ou te maua ni ta’ita’iau se to’aono pei o Lauaki, e mafai ona ou pulea le lalolagi.”

O le gagana o aso uma, e fa’amama’i, e fa’asasano, e fa’asasalu, e fa’aaviavi atoa ai ma le mau faaupuga aga eseese. O le gagana fa’aaloalo e taua tele, ae ulagia fo’i le tagata pe a sese ona fa’aaoga, pei o le tala a le isi tina, ”Ou te le silafia le igoa o le faife’au”.

O le gagana maotua, o le atuafetalai ma le ‘aufa’amaui, e fausia mai i Alagaupu ma Muagagana Tofiga ma mavaega Talatu’u ma tala o le vavau Faalupega ma faia, Maota ma laoa, Tupua ma malaefono, O lagi ma toga, Aganuu ma agaifanua, Taaloga ma poula ma le tele o isi aga o le Faasamoa. O le gagana fo’i e Filia i le tai se agavaa, Filia i le vao se Taufanua. Ae filia i Malae se tulatoa.

Fai mai nisi e mativa le Gagana Samoa, e mafua ai ona asamo. E asamo le tagata ona e leaga lona ma’umaga, e paie, e pala’ai. Manatua a fanau mai se tagata fou ua faaopopoina le aofa’i o tagata. E faapena foi pe a fanau se mea fou ua faaopopoina upu o le gagana. E le leaga upu nono ae tele a tatou fasiupu amata, fasiupu faai’u poo upu e fesoota’i uiga e fau ai nisi upu fou.

Ua mou malie ese atu le tele o aga sa maua ai le tele o upu. Ft. O aso la sa o tagata e su’e le vai e feinu ma ta’e’ele ai. O aso nei ua alu atu sa’o lava le vai i lou fale. O asugavai ma taelega e fua i le pe o le tai e magalo ai le vai. Afai lava faatoa pe le tai i le leva o le po, o le taimi fo’i lena e tumutumu ai le vai i

asugavai ma ta'elega. O le nofoaga e fetau ai tagata. E tele ai tala. O tala malie ma tala e gaoa ai le nuu. A alu le teine e asu vai ae maua mai ai ma le amovai. O se galuega e fiafia tele iai tupulaga tama, o le auauna i teine o le nuu.

O le masaniga i tala o le vai ma le usuga, e maua ai ama o va'a. E maua ai fo'i ma le aumatua ma le oso ma le lau. O vai'eli e maua ai le upu, "Tatou ta'ele maia le taufa. A vave ona mai le vai, a ua lata le vavao o le afiafi, ona ta'ele lea na o lalo, se'i aulia taeao.

Talofa i fanau a nei e ta iai le efu o le fau. Vaai le muli o le ola poo a ni momoi mea o totoe ai. O le a sau faapolopolo faamatuamoepo aua lau fanau, lou aiga ma lou atunu'u? Se'i fola atu nai lau ta'amu nei mai A'opo pe maua ai se faalumaga.

Na lautogia le Ta'ita'i o le tasi Ekalesia e ta'ita'iina le sauniga o le Tuto'atasi i Mulinu'u. Sa saunia lelei mea uma. Na sili ona saunia lelei lana lauga i le gagana faapeletania ma na matua ofo e na faalogologo i lona poto e nanu. Na faamalo ma faafetai i ai tagata i lana tapenaga. Na feiloa'i ma le Ao o le Malo le susuga i le Malietoa ona faapea atu lea o Malietoa, "Manaia tele lau lauga, ae vaai oe, e malamalama fo'i le Atua i le Gagana Samoa."

Fai mai si a'u uo pei e taia i uaea eletise malolosi ma ua fia mou ese ma Mulinu'u, ona ua ia talia vave le ote a le toeaina.

Sa fofogaina i le fono a le FAGASA – i Apia 2016

